



SUPER

# POESEOS ROMANAE PRAESIDIIS QVIBVSDAM

SCRIPTISIT

NOMINE SOCIETATIS LATINAE

QVAE SVB

VIRI EXCELLENTISSIMI AMPLISSIMI

## IOANNIS CAROLI CHRISTOPHORI FERBERI

PHILOSOPH. DOCT. LOG. ET METAPHYS. PROF. PVBL. ORD.

SOCIET. DVC. TEVTON. HELMSTAD. EPHORI

AVCTORITATE

HELMSTADII VIGET

## AMICIS NONNVLLIS

AB ACADEMIA IVLIA CAROLINA DISCEDENTIBVS

EVENTVS STVDIORVM FELICISSIMOS

ET FAVSTA QVABLIBET

PRECATVS

## HENRICVS PHILIPPVS CONRADVS HENKE

BRVNOVICENSIS

SACR. LITTER. CVLT. SOCIET. DVCAL. TEVTON. HELMSTAD.

SODAL.

\*\*\*\*\*

## HELMSTADII

EX OFFICINA MICHAELIS GVNTHERI LEVCKART

CICICCLXXIIII



**NOMINA SODALIVM**  
**SOCIETATIS LATINAE HELMSTADIENSIS**

**ANTON. AVG. HENR. LICHTENSTEIN** PHILOS. D.  
ART. LIB. M. SOC. DVC. TEVTON. SODAL. ORDIN.

**HENR. PHIL. CONR. HENKE.**

**LVDOV. ANDR. WITTEKOPF** THEOL. CAND. IN TEM-  
PLO ACAD. A CONCIONIBVS HABENDIS ET SOC. DVC.  
TEVTON. ADSCR.

**GEORG. FRID. SAMVEL TROTT** IVR. CAND. SOC. DVC.  
TEVTON. AB EPISTOLIS.

**IAC. CHRIST. WELAND** BREMENSIS, SACR. LITTER.  
CVLTOR, SOC. DVC. TEVTON. HELMST. COLL.

**AVG. GEORG. A BRANDENSTEIN** GVELPHERBYTANVS,  
IVR. VTR. STD.

**IVST. CHRIST. LVD. LVETTICH** THEOL. CAND. IN  
TEMPLO ACAD. A CONCION. HAB. ET SOC. TEVTON.  
SODALIS.

**CAR. CHRIST. SCHVLTESIVS** WISMARIENSIS, IVR.  
VTR. CVLT.

**CAROL. WILH. NOSE** BRVNOVICENSIS, ARTIS MED.  
CVLTOR



VIRIS

INGENIO ET DOCTRINA PRAESTANTISSIMIS  
IVLIO GEORGIO AVGVSTO MACKENSEN

HELMSTADIENSI

CAVSARVM PATRONO GVELPHERBYTANO

FRIDERICO AVGVSTO WIDEBVRG

BRVNOVICENSI

SACR. LITT. IN ACAD. IENENSI CVLT. SOC. DVC. IENENSIS  
TEVTON. ET LATIN. ET HELMST. TEVTON. COLLEG.

IOAN. GVILIELMO THEOPHILO WOLFF

BRVNOVICENSI

S. S. THEOL. CAND. COLLEG. RIDDAGSHVS. SACRI MEMBR  
ET SOC. DVC. TEVTON. HELMST. SODAL. HONOR.

IOACHIMO FRIDERICO MEIER

LYNEBVRGENSI

SACR. LITT. CVLT. IN ACAD. GOTTING.

IOANNI GEORGIO LAMPE

HAMBVRGENSI

REVER. MINIST. HAMBVRG. CANDIDATO

IOANNI FRIDERICO IVERGENS

BRVNOVICENSI

ARTIS MED. CVLT. IN COLLEG. BEROL. REG.

CHRISTIANO VON DER VECKEN

HAMBVRGENSI

IVR. VTR. CAND. ET NOTAR. PVBL. CAESAR.

S. P. D.


HENRICVS PHILIPPVS CONRADVS HENKE

*Spero fore, ut non ingratum fit VOBIS, AMICISSIMI VIRI, hoc  
qualecunque munusculum, quo amoris erga vos nostri, memorisque  
VESTRVM animi significationem contineri volumus. Tametsi enim et  
A 2  
mihi,*



mihi, et omnibus, quorum nomine iussuque scribo, nihil tristius euenire poterat, quam quod per diuturnum tempus, nisi forte — hem! utinam egregie falleret nos auspiciū! — per aeternum VOBIS, id est, iucundissimis vitae nostrae deliciis carere abhinc deberemus, tamen mirifice leniuit dolorem nostrum dulcis et amoena de VOBIS VESTROQUE, quem absentes etiam seruastis, erga nos amore, cogitatio, in qua nobis videmur, quasi in praeterita redire, non ea, quae transacta et elapsa iam sunt, recordatione reuocare: ita pectori nostro, ac paene intimis sensibus infixam VESTRI memoriam habemus, nec immerito. VOBIS enim permulta debemus, eademque tanta, quanta raro putem amicos ab amicis vel consequi, vel expectare tantummodo posse. VOS nobis arctō, quod linguae Latinae colendae studium inuicem copulauerat, vinculo iuncti numquam non de nobis nostroque instituto bene meruistis. VOS denique semper propemodum in ludicris et seriis pari nobiscum voluntate concinuistis, ut unam mentem in pluribus esse diuisam crederes. Sed loquacem me fecistis, DULCISSIMI, dum VOS quasi coram spectare videor. Suauis hic est error, et in quo non leuiter egomet mihi placeam. — Interim dum ulterius vagari non licet, ita ut viuatis opto, et valeatis semper, quemadmodum meretis, hoc est, optime, iucundissimeque. Numen praesentiat votis nostris, et in honorem patriae VESTRVMque industriam virtutemque VESTRAM compenset. Ceterum, ut conseruetis nostri memoriam, non quod de VESTRA constantia dubitem, sed quia mos est ita rogandi, rogo. Dab. Helmstädt, a. d. VIII Iun.

CIDIOCLXXIIII



SVPER



SVPER  
POESEOS ROMANAE  
PRAESIDIIS QVIBVSDAM.

---



**E**tsi in humano ingenio, sicut in terra omnium fructuum, ita omnium artium materia latet, tamen, ut *non omnis fert omnia tellus*, sic cuiusvis non modo hominis, sed nationis ingenium cuiuslibet vel artis vel doctrinae frugem pari copia et laude gignere nequit. Cuius quidem rei veritatem per omnem omnino eruditionis et liberalium artium historiam compertam atque indubitatam reperimus. Sic eloquentiae, poëseos aliarumque elegantiorum litterarum studium apud nullam terrarum gentem laude floruit maiori, quam apud Graecos, et ab his si discesseris, palmam in eo debere genere Romanis, qui unquam negaverit, scio neminem. Equidem vero quum illam semper studiorum putaverim rationem optimam, eamque pariter viris probatam longe praestantissimis viderim, quae non in legendis modo veterum scriptorum libris versaretur, sed curatius quoque



quoque perpenderet virtutes illorum, easque quibus auxiliis adsequuti sint, dignosceret; hanc sane operam non inmerito in Romanorum poetis collocare videor. Neque prorsus omni destitutam esse vtilitate putauerim huiusmodi disquisitionem, quamquam non sim ille ego, qui hac mea diligentia multum profuturum bonis litteris esse confidam, nedum sperare possim ob meam, cuius bene mihi sum conscius, tenuitatem. Retinet enim omnem temerariam arrogantiae opinionem verecundia quaedam, et is, quo natura sum, pudor, satis me tutum ab illa praestat. Atqui vero, quum multiplex ratio sit praesidiorum, quibus alantur ingenia, artis, quam colunt, innutriantur opibus, et ad hoc illudue potissimum studiorum genus vel inuiti ducantur, nempe, vt alia ex animi ipsius viribus et natura petita, alia vero eius sint generis, vt coeli, morum, sollertiae, educationis cet. beneficio contingant: id effici posse enumerandis et percensendis his poëticae artis apud Romanos causis et auxiliis, vt, qui arti huic liberali operam nauent, sedulo attendant ad illa, quae penitus in nostra sint potestate posita, eademque in suam conuertant vtilitatem. Ceterum versari me scio in argumento, quod vberius, quam harum fert paginarum angustia, tractari et possit, et mereatur. Satiis vero duxi, perituris parcere chartis, quam prolixa garrulitate nauseam denique excitare legentibus.

Primum autem, quod attingendum mihi est in hoc loco poëticae artis, quae apud Romanos subsidia fuerint, perlustraturo, eo fere inest, vt iis respondeam, qui nulla prorsus aliena ope, nullis, quae extra hos sint, auxiliis alii sustentariue, vno saltim ingenio vnaque poëtica praeclaram fingendi artem absolui sibi persuadent. Equidem satis perspectum cognitumque mihi habeo, sine ingenii excellentia, et, cum Cicerone vt loquar, sine *adflatu diuino*, neminem virum magnum vel nasci vel euadere posse. Immo vero illa ingenii poëtici vis diuina, si fas est ita vocare, non opus habet operosa eruditione; sibi iam ipsa sufficit, et a se satis petere valet virium; quin multarum rerum scientiae, variaeque doctrinae onustis sarcinis plus cohibetur, quam fouetur. Namque



— σοφος ὁ πολ —

λα εἰδως. Φυα

Μαθωντες δε, λαβροι

Παγγλωσσια κοραιες ὡς

Ακραντα γαρυετον. α)

Enimvero quemadmodum varia possunt existere impedimenta, quae praecludant illum animi fervorem, ingenique impetum, ita pariter subsidia, quae promovere, accelerare et adflare magis valeant. Sed illud ipsum comprobetur iam nunc vberius, variisque itidem illustretur historiae momentis, necesse est.

Late patet naturae benignitas in Italiae regionibus illis, quas Romani veteres incoluere. Sicut vero Graecorum ingeniorum larga foecunditas et laeta progenies ipsa coeli terraeque fauentissima indole, aërisque molli temperie valde aucta fuit et adiuta: b) ita propemodum eadem naturae beneficia fortunarunt Romanorum sollertiam. Non opus est congerere huc agmen probationum, quibus appareat, non tenuem esse climatis. potestatem ad animi vires vel alendas vel minuendas, ubi res ipsa satis constat ab aliis luculente et ex instituto pertractata. c) — Vt permultum valet coeli, regionum, aquarum ingenium ad hunc illumue terrae foetum vel copiosiori prouentu vel maiori praestantia progignendum, atque ut

*Hic*

- a) PINDAR. Olymp. β. Per σοφον ex antiquissima vocis potestate intelligit poetam. Eodem etiam modo ANACREON Od. 53.

Ροδοχρεσ δε κ' Αφροδιτα

Παρα των σοφων καλειται.

- b) GYYS *literarische Reise nach Griechenland*, P. I. p. 29.

- c) Praeter Dubosium, Montesquieuum (qui tamen nimii sunt aliquantulum in hac re. finesque transgressi) et alios cf. CAR. FR. FLOEGEL V. C. *Geschichte d. menschl. Verst.* p. 52. REU. IO. IAC. RAMBACH *vermischte Abhandl. aus d. Gesch. u. Litteratur*, p. 173.





*Hic segetes, illic veniunt felicius vnae,  
India mittit ebur, molles sua thura Sabaei;*

ita pariter res habet in colendis hominibus, nempe, vt pro locorum situ vel fertili vel steriliori, aëris vel asperitate vel tenui et molli conditione, aut valeat animus, aut destituatur.

— — *Emollit gentes clementia coeli d)*  
et perquam raro experientia monstrat, quod ait IUVENAL. Sat. X.

*Summos posse viros et magna exempla daturus  
Veruecum in patria, crassoque sub aëre nasci.*

Excitatur et alitur iucundiori regionum natura spiritus et phantasiae quidam ignis, quem vt maxime desideramus in poëta. Italiam vero omnem tamquam et amoenissimam et felicissimam omnium terram, *ubi largior aether campos lumine vestit purpureo*, antiqui scriptores et ipsi cum primis poëtae pariter atque recentiores summis ornant laudibus. In illis VIRGILIUS patriam ita descripsit: (Georg. II. 136.)

*— neque Medorum situae, ditissima terra,  
Nec pulcher Ganges atque auro turbidus Hemus  
Laudibus Italiae certent. — —*

Ex hac itaque terrarum suarum felicitate, qua penitus interim luxuriantur poëtae, ingenia eorum vtilitatis plurimum, et suauem indolem sunt consequuta. Hinc tot quasi floribus rident ipsorum carmina, laetis imaginibus et iucunda varietate exhilarata. e) Sed nolo fusior esse in eo, quod Anglorum elegantissimus ille ADDISONIVS iam satis abunde docuit, qui, quae illi videnda nobis prae buerunt, oculorum

d) LVCAN. Pharsal. VIII. 366. Cf. SENECAE epist. 51.

e) Conf. ex innumera locorum segete in primis OVID. Heroid. v. 47. Amor. II. 16. 41. CLAUDIAN. XIV. 18. TIBVLL. I. 3. VIRGIL. Ecl. I. 52. Georg. II. 463. SIL. ITAL. IV. 82. HORAT. Od. I. 4. et infinitis aliis locis.

rum sensu animique iudicio vidit et ipse, visoque regionum terrarumque illarum situ luculente probavit, quam bene et venuste amoenitates earum depictae sint a poetis. f) Semper enim ille poetam quempiam Romanum secum habuit, legitque in ea parte Italiae, in qua vixisse et composuisse carmina diceretur, pari modo ac cuius ipsius acutissimus ROBERTVS WOOD in itinere suo Homerum Sic Tybrida, Padum, Alpès Apenninos, et vel tantum non omnes illarum regionum montes, fluuios, valles et siluas optimos sibi fuisse poetarum interpretes et scholiastas iure profitetur.

Quamuis vero nec illud paruum sit, maius tamen et efficacius poëseos subsidium vniuersa gentis Romanae indole moribusque singulorum et omnium contineri non falso videor adfirmare. Temporum enim et morum humanorum vt maxima semper vicissitudo est; ita etiam vel inde subnascitur dissimilitudo quaedam ingeniorum. Quod quo clarius pateat, breuem et concisam aliquam characteris, quem vocant, nationalis Romani delineemus imaginem. Ab initio vrbis rudis et incultus ab humaniori vita populus omnia vi agere, (LIVIVS L. I. c. 9.) nil nisi arma et militarem violentiam in pretio habere (IUVENAL. Satyr. XV. v. 100 sqq.) diuinitus datam sibi originem gloriari, et de futura, quam augurabantur, maiestate, insolentius superbire; (LIV. I. 16.) mox vero sapienti Numae consilio prudentiae ciuilis et moderatioris prima semina accipere, interueniente simul religionis metu. Et haec fere ratio fuit vsque ad reges expulsos. Tum enim, vt verè CICERO ait, (Tuscul. IV. 1.) *progressio admirabilis, incredibilisque cursus ad omnem excellentiam factus est*; libertatis et patriae inuictus amor, domesticae laudis fiducia, et *cedere nescia virtus*, mentis quaedam magnitudo, et sensus honesti, quae res vera sunt, vt cum LONGINO loquar, libertatis ἀντι-  
χηματα

f) Remarks of several parts of Italy. Lond. 1705. Spectat huc etiam libellus b. KLOTZII, quomodo poetarum ingenia coeli natura formentur, praef. ad nov. edit. fabul. Aesop. Isenaci 1771. et Opusc. philolog. et orator. p. 61.



*χίματα*, omnium occupauerunt animos. Rebus secundis triumphare superbia, aduersis animum non abiicere, calamitatum cuiusvis generis patientes, et tales esse, quos Caudium, quosque Cannae non fregerint. (LIV. IX. 19.) — Mirum in modum generosam hanc indolem aluit, et praeclaris institutis auxit tam publica quam priuata disciplina. Sed nullus adhuc litteris honor, nulla bonarum artium siue laus, siue mentio. Loquendi genus asperum,

( — *agrestis enim tum Musa vigebat.* LVCRET.)

rudis seculi squalorem quemdam, quem insequuta demum aetas deterfit, duriorem aliquam simplicitatem, et horridam prae se maciem ferebat. Poësis erat hoc tempore non plane quidem nulla, nullius tamen pretii, et instar loquelaе paruulorum dimidiata verba tentantium. Interim ingenia, quorum solida erat vis, indulgebant sibi, spiritus ducebant, modo haec modo alia molita, et in sermone illo incommo et incompósito elaborabant subinde, impari quamuis fortuna, et sine arte. (CIC. Tusc. I. 2. TIBULL. II. eleg. 1.) Poësis iam sensim sanctitatem aliquam et virilitatem, ex moribus sensim excultis et ad elegantiam propensis cepit. Romanis demum, victoriarum et bellicae laudis audissima gente, post deuictam Italiam cum populis exteris belligerantibus: ex opulentia rerum subnascente luxur, elegantiae et splendoris amore, mores pariter atque animi laxati et voluptate quadam deliniti paulatim exsistere. Namque haec est communis aliqua fors artium omnino omnium, ut in paupere et frugali ciuitate, g) quae vtilitatem magis, quam oblectamenta spectet, vel incognitae vel spretae plerumque iaceant; rerum vero late et vsquequaque confluentium abundanti homines sensim, circumspēctis, ubi diuitias in sua vertant commoda, viis, in illas primum incidant delicias, quae animum capiant, et suauis modo demulceant. Neque obstat profecto enūciato huic ipsa artium liberalium apud Romanos historia. Iam enim legimus ipsos belli duces fortissimos *scipiones* elegantes

- g) Qualis quidem Roma fuit antiquitus. Nam ita FABIVS: veteribus Romanis summum luxuria crimen. Inst. Orat. III. 7. Conf. adhaec ISELINI *Geschichte der Menschheit* Lib. VII.



elegantes fuisse studiorum, omnisque doctrinae et auctores et admiratores, vt praecellentes ingenio viros ENNIUM, POLYBIUM, PAE-  
NAETIUMque domi militiaeque secum habuerint. (VELLET. PA-  
TERC. Lib. I. cap. 13.) Diuersa quamlibet ab his fuerit mens L.  
MVMII et CATONIS, quorum alter Corinthiacas maximorum  
artificum perfectas manibus tabulas et statuas in terram proiici et mi-  
lites super illis ludere talis passus est, quod STRABO (Lib. VIII. p.  
262.) ex POLYBIO, qui et ipse praefens viderat, recenset; alter  
vero M. NOBILIORI vt probrum obiecit, quod is in provinciam  
poëtas duxisset: (CIC. Tusc. I. 2.) sensum tamen obtinuit in locupleti  
statu pulchri et venusti sensus, et moribus politis ingenia etiam pro-  
pullulare coeperunt, bello inprimis Punico secundo. Ita enim FOR-  
CIVS LICINIVS: (Gell. N. A. L. XVII. 21.)

*Punico bello secundo musa pinnato gradu*

*Intulit sese bellicosam in Romuli gentem feram.*

Coëunt autem heic plura veluti ex pari, vt, quo coeptum est tra-  
mite, pergi nequeat, nisi per diuerticula quaedam in viam redeam. At-  
tingenda enim sunt hoc loco, quae Romanorum mores, et ex his, quae  
poësis accepit per Graecos ornamenta. Hi enim quum essent in  
omni, quam late patebat, orbe terrarum in quouis liberalioris doctri-  
nae genere felicissimi et inuentores, et auctores, venustatis et vrbani-  
tatis optimi omnium magistri, ac denique morum cultusque domestici  
elegantia longe praeclarissimi; hoc deesse videbatur magnitudini Ro-  
manae, vt ad eminentem illam, qua Graeci florebant, laudem maxime  
adspirarent. Inuasit paulatim eius quoque gloriae cupido, vt quantum  
illos fortitudine ac potentia, tantum etiam ingenio superare vellent  
et πάντων ὑπερήμενοι ἄλλων. Quamuis vero iam dudum fuissent  
Romanis commercia quaedam cum Graecis tam publica quam priuata,  
non sufficebant tamen haec ad communicandas litteras, quarum amo-  
rem demum praestantissimi triumviri DIOGENES, CARNEADES  
et CRITOLAVS Romam Athenis publici alicuius negotii causa missi  
commendabant. Et hanc quidem ab illis profectam sollertiam non  
poterat extinguere dura CATONIS seueritas, Graecis quamlibet  
ciectis.



cieclis. Alebant enim hos primos igniculos grammatici Athenienses, et alii, qui subinde quaeslus ergo artem suam docebant Romae, vel ad quos audiendos Romani discedebant. Sed deuictis tandem Athenis descendere quasi videbatur litterarum et morum cultus ad Romanos, et

*Graecia capta ferum victorem cepit et artes*

*Intulit agresti Latio. — — h)*

Ab hoc enim inde tempore libri Graecorum poetarum frequentius lectitabantur, quam antea, Athenas quoque abhinc, ceu florentissimum artium emporium, saepissime profecti iuvenes litteris operantes deportabant in urbem cum morum elegantia studiorum, philosophiae, eloquentiae ornamenta. Quae quum communi quodam et sororio vinculo, vel necessitudine quasi colligata, sua inter se bona communicent, altera non amplitudinem modo, sed vim etiam et robur alterius augeat; ita pariter poësis, cum ipsis illa doctrinis litterarum ad Romanos propagata, earundem quoque opibus et locupletata fuit et efficta. Non opus esse duco, vberius comprobare rem, quae apud omnes constat, nimirum ex imitandi Graecos amore et studio etiam eripiendi virtutis poëticae laudem illis iam sensum languescentibus, plerosque Romanorum poëtas ad scribendum excitatos, eamque ob causam inferiores quodammodo illis existimandos esse. i) Quis enim nescit, omnia ab illis secundum Graecorum exemplar conscripta et adumbrata esse? Homerum VIRGILIO, Pindarum Alcaeum, aliosque HORATIO, Callimachum CATULLO et, vt breuiter comprehendam, optimo cuilibet apud Romanos poëtae nisi materiam, occasionem saltim scribendi dedisse Graios, quois, vt ipse illorum aliquis ait,

— — *queis dedit ore rotundo*

*Musa loqui. — —*

Aliae quoque ab Graecis petitae doctrinae nostris profuerunt, veluti multa

h) HORAT. epist. Lib. II. 1. vers. 156. 157.

i) conf. S. V. ERNESTI de ingeniorum Graecorum et Romanorum comparatione, acroasis. Cpusc. Orator. p. 113.



multa ex philosophia sumfisse **TERENTIVM** auctor est Cicero. (Tuscul. III. 15.) Quinimmo **LVCRETIVS**, qui, vt ipse sibi bene conscius est; (Lib. I. v. 928.) *ausa Pieridum peragravit loca, nullius ante trita solo*, totus in philosophia elaboravit, et ita popularem, copiosam, venustamque fecit Epicuri rationem, vt nihil possit ea comitius esse et elegantius. Vt de reliquis, qui Graecorum sapientum placita ingenio suo exornarunt, vnum solummodo adducam exemplum, quo, quam bene et suauiter poëtae Romani philosophorum Graecorum scripta in ornatum carminum suorum legerint, et imitatione repetierint, dilucide pateat. Notissimam illam **PRODICI** fabulam de Hercule in biuio virtutis et voluptatis versante, quam egregie narrat **XENOPHON**, (Memor. Socr. Lib. II. c. 1.) eandem praeter alios Graecos pariter ac Latinos scriptores, **PLAVTVS** k) comicus et **SILIVS ITALICVS** l) grauiter expressam omni poëscos decore adumbrarunt.

Sed vt eo reuertar, vnde sum egressus, ex opulentia, victoriarum copia, et cum aliis gentibus habita consuetudine mores Romanorum vniuersos ad singularem aliquam nitidis et elegantiae formam compositos esse, ciuesque ad liberaliorem luxum propenses fecisse supra iam dixi. Quibus quum magna sit vis ad cultum ingeniorum, in eo ipso causam mihi videor deprehendere, saltim aliquam, (plures enim iam recensui, et infra etiam nonnullas dabo) tanti poëtarum imperante **AVGVSTO** prouentus, eorumque etiam praestantiae. Hinc vrbalitas illa et suauitas in **HORATIO** m) et **VIRGILIO**, hinc ille color ingenuus, spiritus magnitudo, imaginum et orationis diuitiae fluxerunt, quae omnia non parum aluit splendor aulae Augustae, tum temporis quae vna sedes magnificentiae,

B 3

k) **PLAVT.** Trinum. Act. II. sc. I. integra.

l) **SIL. ITAL.** Lib. XV. Vers. 1-130. vbi Herculis personam agit **SCIPIO AFRICANVS**.

m) Exposuit de hac **HORATII** virtute Excell. **SCHIRACH**, quem honoris et grati animi testandi causa nomino, in Clau. Poët. P. I. voc. *Vrbanus*.



tiae, et verissima elegantiae schola in omni fuit imperio. Vidit haec ferax in singulis artibus ingeniorum aetas perductam ad summum culmen (quantum humanae res patiuntur,) artem poëticam, non adornatam illam cincinnis, aut muliebribus quaesitam pigmentis, sed integra valetudine efflorescentem, plenam masculae et incorruptae dignitatis. Similiter autem, ut fit, quod procedere nequit, ut recedat deinceps, et saepissime eadem sit causa rerum crescentium, quae, si in vitium nimii vertitur, decrescientium: sic sequiorum temporum sub imperatoribus male ominatis luxuries, morum indies degenerantium pravitas, adfentatio, fordidi lucri studium et infausta libido, quae omnia peruertit, salubritatem etiam misere perdidit ingeniorum. *Nec se Roma ferens molè sua collapsa est.* —

*Namque ut opes nimias mundo fortuna subactò*

*Intulit, et mores rebus cessere secundis.*

*Non auro testisue modus, mensasque priores*

*Aspernata fames.* — —

LVCAN. *Pharscl.* X. 160.

Vbi itaque vita et mores hominum a pristino decore facti sunt mirum quantum alieni; scripta etiam ab antiquae forma elegantiae recesserunt. n) Omnes enim ad pessimum quoduis ferri, praedulci ornatu omnis simplicitatis experte capi, floridae lasciviae, exquisitis verborum delinimentis prae vera et naturali pulchritudine locum relinquere, et orationi fucò illitae, congestis epithetorum et acutiarum crebro pugnantium lenociniis indulgere. Habet quidem suas quisque illorum temporum poëta virtutes, SENECA vel potius PSEUDO-SENECA, LVCANVS, SILIVS ITALICVS, PETRONIVS, CLAVDIANVS, STATIVS cet. sed neque tot, neque tantas, quot et quantas seculi Augustei prae se fert quilibet. Horum enim, sic praeclare iudicat WINKELMANNVS, ignis ardet, illorum autem flagrat flamma. Quaesita elegantia nunquam placet, nisi quod, qui anxie

n) Cf. SENECA. epist. LI. Tales quidem hoc tempore plures erant moribus, qualem scribit fuisse C. PETRONIVM Tacitus Ann. XVI. 18.

anxie quaerunt, similes illi sunt iis, qui philosophorum lapidem explorare student, frustraneum quidem laborem fubeunt, nonnumquam tamen vtilia proferunt. — Qui huic gliscenti malo summa diligentia obstitit, et corruptum illud et fractum omnibus vitiis dicendi genus reuocare ad seueriora iudicia contendit, FABIVS QVINCTILIANVS, causam eius multis locis deprauatam indolem ciuium sui temporis esse sentit: *Nos certe, inquit, in omnia deliciarum genera vitiaque dicendi quoque genere defluximus.* Propterea, vbi antiquiores poëtas commendat, hos omnino diligentiores esse contendit, quam plerosque nouorum, qui omnium operum solam virtutem sententias putarent. o) Et verum fane hoc enunciatum esse facile deprehendet quisque, qui diligenter huius aevi poëtas introspexerit.

Sed iam ad aliud attendamus praesidium artis, idque non minus efficax et forte, quod ex sermonis Latini contigit opportunitate. Quantum enim conferat lingua tam ad colendam ingenii virtutem, quam ad parandam aliquam in poësi vim, grauitatem, dulcedinem, non opus est edisserere, si quidem hoc iam satis ab aliis probatum est, et sine sermonis beneficio nec quidquam praeclari potest emergere in studiis doctrinarum. (QVINCTIL. I. O. Lib. II. c. 17.) Iam vero lingua Romana satis aspera quidem fuit ab initio, dura etiam, et cum ipso statu ciuitatis pauper, litterarum tamen mox interueniente auxilio, aliisque multis de causis, quas enumerare omnes hoc loco longum foret: p) (Vid. HVB. FOLIETA de praestantia ling.

o) Inf. Orat. Lib. I. c. 5. Alibi idem limatissimus iudex miseram educationis puerorum rationem viuide depingit. *Infantiam statim deliciis soluimus. — Quid non adulus concupiscet, qui in purpuris repit? Nondum prima verba exprimit, et iam coccum intelligit. iam concubylum poseit. Ante palatium eorum, quam os, instituius. In lecticis crescunt. — Omne conuiuium obscenis canticis strepit; pudenda dictu spectantur. — Lib. I. c. 2.*

p) Refero huc inprimis commercia Romanorum cum aliis gentibus, Graecis, Poenis, aliisque, dein curas rhetorum et grammaticorum, eorumque auctoritatem, et praemia, denique ipsam reipubl. formam. Namque inter arcana dominationis et imperii referebatur,





ling. lat.) ita sensum et ditata et emollita est, ut, si a Graecis recedam, cuius terrarum gentis lingua maiori, quam Romana, dignitate et excellentia fuerit, existimem esse nullam. Namque erat natura sua diues, copiosa, laetissima verborum varietate, et compositionis libertate sonora, quae simul sumta faciliorem et paratiorem illam reddiderunt ad accipiendam eloquentiae metri legibus adstrictae formam, et cum dulci suauitate decurrentes versus. Hic linguae Latinae singularis nitor sub finem potissimum liberae reipubl. eloquentiae in primis, cuius tum temporis arceam tenebat CICERO, opibus ad summum, quem poterat adsequi, perfectionis gradum euectus non parum profecto venustatis, Atticae gratiae et lacteae vbertatis conciliauit carminibus poëtarum, qui circa haec tempora inclauerunt, tantum non omnium. Quotusquisque in VIRGILIO non adamat, seu admiratur potius verborum flexilem concinnitatem, harmoniae iucunditatem, translationum ornatum, decoram et compositam speciem? Atque vero tunc, VIDA canit;

*Tunc linguae Ausoniae potuit quae maxima virtus*

*Esse fuit, — —*

Sed nihilo minus reseruauit Romana lingua formam aliquam seueritatis illius, qua pristinis temporibus distincta fuit. Hinc factum, ut ad epicae magis, quam ad lyricae, et molliorem linguae indolem desiderantis poëseos classem efformandam esset accommodatior. Vnum HORATIVM Roma habuit, qui cum Graecis contendere possit, epicos vero poëtas quam plurimos. q) Et ipsi adeo poëtae Romani non diffitentur hunc sermoni patrio defectum esse, palmanque debere Graecis. Sic enim MARTIALIS (Epigr. Lib. IX. 12.)

*Nomen*

tur, linguam excolere patriam. Vid. S. V. BOYSSENII tract. *von der Litteratur der Roemer*, in Tom. I. histor. Rom. p. 314. et Celeb. IO. ERN. IMMAN. WALCHII *de arte critica vet. Roman.* Cap. I.

- q) Rev. I. I. RAMBACH progr. de poëtarum Lyricorum apud Rom. paucitate. Quedlinb. 1771. adde quae Excell. SCHIRACH disputat in praefat. Clau. Poët. Parti I. praemissa.



*Nomen nobile, molle, delicatum*

*Versu dicere non rudi volebam;*

*Sed tu syllaba contumax repugnas. —*

*Graecis est nihil negatum, —*

*Nobis non licet esse tam disertis,*

*Qui musas colimus seueriores.*

Itaque nullo modo persuadere mihi possum, lepidissimam fuisse illam, quam GELLIVS iactitat, (N. A. Lib. XIX. 9.) ANTONII IVLIANI responsionem, qua ille, tamquam pro aris et focis pugnans, linguae patriae dulcedinem perquam eximiam inesse, acriter defendere ausus contra Graecos, versus quosdam VALERII AEDITVI, CATVLLI, LICINII excitat, quibus mundius, venustius, limatius, pressius nihil quidquam reperiri putat. Satis, fateor, inepta haec disputatio GELLII mihi videtur. Nisi enim me omnia fallunt egregie, mediocria sunt, et valde inelegantia, quae Anacreontæis et Sapphicis deliciis opponere studet IVLIANVS iste. — Quare quum, uti dixi, ad seueriora faciliior esset sermo Romanus, non tamen satis mirari possum, qui factum sit, ut poëtae in duobus artis suae ramis tam segniter elaborarent, *didactico* nimirum, quod vocant, genere, et *tragico*. Cuius rei dum causam inquirō, nullam reperio, praeter hanc, quod ab altera carminum classe magnum LVCRETII CARI exemplum deterruerit fortassis alios, ne vanam operam perderent aemulandi, altera vero vix potuerit emergere, quod plebs (vitio creatus arbiter) saeuīs adsueta spectaculis parui existimauerit tragicorum conamina. r) Hinc etiam tragoediae simul illae, quae SENECAE vulgo tribuuntur, cruenta carmina vocari merentur. Feliciores paululum Romani fuerunt in comoedia, quamuis in hac etiam claudicasse ipsos EABIVS iudicet. (I. O. X. 1.) Iuuit tamen non parum comicam vim et sales lepidos antiqua illa, quam in *Pacto* adamat TVLLIVS (Epist. ad famil. IX. 15.) et vernacula festiuitas linguae.

C

Ho-

- r) Plura qui nosse cupit, adeat KLOTZII praefationem novae versionis carminis Popii: *Essay on Man.* praefixam, et Ill. LESSINGII librum omni laude maiorem *Laokoon* P. I. p. 45.



*Honor*, inquit CICERO, *alit artes*, omnesque incenduntur ad studia gloria, seu, vt de poëtis differens ad poëtae sententiam pro-uocem: (OVID. Trist. V. 12. v. 37.)

— *non paruas animo dat gloria vires,*

*Et foecunda facit pectora laudis amor.*

Eadem fors, eadem fortuna contigit etiam arti poëticae apud Romanos, quae vniuersis litterarum doctrinis. Ex quo enim primis labris gustare didicerant dulcedinem poëseos, et delectari sensum coeperunt hisce deliciis, et honore habuerunt eos, qui tantorum bonorum auctores fuerant primi. Enimvero quo ininus antiquitus honoris erat poëtis, eo minora studia fuerunt: s) Namque iacent ea semper, quae apud quosque improbantur. Contemptus autem illius causam absque dubio ipsis etiam, qui primi elaborarunt in ea, adscribere non inepte videor. Dum enim hi, magnis licet ingeniis in eo genere exsisterunt, non satis Graecorum responderunt gloriae, eamque ob causam inferiores et nauci fuerunt habiti. Quapropter admodum fero tandem eluctata est artium praestantissima omnium, licet vsus ipsius maturior fuerit. Namque et Saliorum quandam poësin fuisse, vix sacerdotibus suis intellectam QVINCTILIANVS ait, (I. O. I. 4.) et solitos esse in epulis canere conuiuas ad tibicinem de clarorum hominum virtutibus, honorem tamen huic generi non fuisse accepimus. CIC. Tusc. I. 2. IV. 2. quin id etiam XII tabulae declarant, condi iam tum solitum esse carmen, quod ne liceret fieri in alterius iniuriam lege sanxerunt. — Sed primos demum spiritus duxit vera poësis, quum LIVIVS ANDRONICVS fabulam Romae ageret, et insolito plausu ornaretur. (GELL. N. A. XVII. 21.) Excitauit huius laudis aemulatio, et celebrati fama nominis alios, ingeniisque subdidit stimulos. Hos inter erant ACCIUS PACUVIUS, NAEVIUS, alii, egregia tum laude clari, in quibus tamen, FABIO iudice, (Instit. Orat. L. X. c. 1.) nitor, et summa in excolendis operibus manus magis videri potest temporibus, quam ipsis defuisse. ENNIUM patrem, ingenio maximum,

s) CIC. Tusc. Lib. I. 1. *An censemus, si Fabio, nobilissimo homini, laudi datum esset, quod pingeret, non multos etiam apud nos futuros Polycletos et Parrhasios fuisse?*

ximum, arte rudem praedicat OVIDIVS t) in deliciis fuisse SCIPIONI magno, et omnium praeclare ab eo gestorum socium exstitisse et comitem.

*Cura deum fuerant olim regumque poetae,  
Praemiaque antiqui magna tulere chori.  
Sanctaque maiestas et erat venerabile nomen,  
Vatibus, et largae saepe dabantur opes.*

ENNIVS emeruit —

*Contiguus poni, SCIPIO magne, tibi.*

Quia eidem imperatori laudi datum esse legimus, quod tanto rerum suarum praeconi statuam v) super sepulcro suo poni iusserit, (LIVIVS XXXVIII. 56. CIC. p. Arch. c. 9.) tamquam gravissimum sui ipsius elogium, et ita pariter, ut PHIDIAS sui similem inclusit in clypeo Mineruae, quum inscribere non liceret. Nobili quadam et gloriantis laudis suae conscientia et ipse poeta nominis sui famam immortalitatis finibus terminavit:

*Adspicite o ciues senis ENNII imaginem formam!*

*Hic vestrum pinxit maxima facta patrum —*

*Nemo me lacrymis decoret, nec funera fletu*

*Faxit. Cur? volito vivu' per ora virum. x)*

Pauper tamen obiit, y) ut celebritatis, qua vixerat, honor magis videatur artis suae magister, ingenique largitor fuisse, quam venter. Similis conditio fuit omnium fere poetarum hoc saltem tempore. Laudabatur virtus, sed algebat plerumque; atque emergebant tamen ingenia, obstante licet re angusta domi. — Huc refero, quod TERTIIVS familiariter vixit cum SCIPIONE AFRICANO, et LAELIO, tantis viris, domi militiaeque praestantissimis, quorum laude, pariter atque grandi theatrorum plausu non leuiter floruit. Quinimmo honorem poetis, qui habebatur, ita auctum fuisse accepimus, ut corona-

C 2

rentur,

t) OVID. Art. amat. Lib. III. 405-409. cf. Trist. II. eleg. I. LVCRET. de rer. nat. I. 118.

v) Honos ille solummodo erat illorum alias, qui bene de republ. meruerant. PLIN. H. N. XXIV. 5.

x) CIC. Tuscul. I. 15.

y) IDEM de Senect. c. 6.

rentur, quem ritum et ipsi peregerunt imperatores. Vid. ROSIN. Antiquit. Rom. p. 751.

Attingendae etiam sunt hoc loco recitationes et publica, quibus poëtae utebantur, certaminum varia genera. His enim optimus quisque vacabat, et audientium sententias in emolumentum lecti poëmatici adhibebat, siue fuerit laudis cupiditate, siue acimulationis studio, siue etiam, ut sit, invidia ductus. Quidquid erat, vtilitas tamen harum exercitationum sane non tenuis redundabat in poëtas. 2) — Sed nullo temporis aevo potentius fuit hoc gloriae incitamentum, nullo pariter plures et praestantiores exorti sunt poëtae, quam imperatore AVGVSTO. Is enim vnus omnium maxime fouebat ingenia, litterarum et poëticae cumprimis honorem profitebatur, atque vel integros dies inter lacrymas et singultus, hoc est, cum HORATIO et VIRGILIO, vivebat, summo illos non fauore, sed amore potius amplexus. Testes Augusti epistolae, testis ipse populus, qui auditis in theatro versibus VIRGILII, surrexit vniuersus, et sorte praesentem spectantemque VIRGILIUM veneratus est, sic quasi AVGVSTVM. (Dial. de caus. corruptae eloquent. c. 15.) — Habebant et ipsi MAECENATEM, cuius, tamquam amici et aequalis, consuetudine fruerentur. — Otium erat porro, et vita ab omni publico negotio et forensi strepitu immunis, remota a sollicitudinibus, et necessitate quotidie aliquid contra animum faciendi, dulci Musarum cultui vnice intenta. Haec vitae ratio tanta pectoris libertate, (bene vero canit, quisquis libere cogitat) et hilari voluptate beauit ipsorum animos, ut reapse videantur experti esse, quod miser OVIDIVS sibi optabat:

— *carmina lactum*

*Sunt opus, et pacem mentis habere volunt.* —

— Sed super tali re melius foret, nihil, quam parum dixisse.

- 2) PLIN. Epist. III. v. 3. OVID, Trist. IV. 10. SENECA Contro-uerf. XVI. — Ceterum errant, qui *collegium* aliquod *poëtarum* certis quibusdam legibus sanctum et institutum fuisse Romae contendunt, inter quos est LOMIER de biblioth. p. 337. Nec quidquam enim hoc probare conantur ex duobus locis, altero OVIDII (Trist. v. 3. 47.) altero VALERII MAXIMI (Lib. III. c. 7. n. 11.) Profecto, nisi temere quaeras eiusmodi collegium, vtrumque scriptorem ne somniasse quidem videbis de tali.

